



REPUBLIKA E SHQIPËRISË

## KËSHILLI I LARTË GJYQËSOR

Nr. \_\_\_\_\_ Prot.

Tiranë, më \_\_\_\_\_.\_\_\_\_.2024

### V E N D I M

**Nr. 326, Datë 03.07.2024**

#### PËR

#### **KUALIFIKIMIN E KANDIDATES FITUESE PËR NË PROGRAMIN E FORMIMIT FILLESTAR TË SHKOLLËS SË MAGJISTRATURËS, VITI AKADEMIK 2023 – 2024, PROFILI NDIHMËS LIGJOR, ZNJ. {...}**

Këshilli i Lartë Gjyqësor, më datë 03.07.2024, pasi u njoh me materialet e çështjes dhe relacionin “Për gjendjen e faktit dhe ligjin e zbatueshëm në lidhje me verifikimin e kushteve dhe kritereve ligjore të kandidimit për në formimin fillestar, për ndihmës ligjor, në Shkollën e Magjistraturës, të kandidatës znj. {...}”, përparitur nga relatorja e çështjes znj. Fatmira Luli, si dhe pasi shqyrtoi propozimin për kualifikimin dhe lejjimin e kandidatës për ndjekjen e Programit të Formimit Fillestar të Shkollës së Magjistraturës, viti akademik 2023 – 2024, profili ndihmës ligjor;

#### V Ë R E N:

#### **I. PROCEDURA E VERIFIKIMIT**

1. Znj. {...} është kandidate për në Programin e Formimit Fillestar në Shkollën e Magjistraturës, profili ndihmës ligjor dhe është vlerësuar nga Këshilli i Lartë Gjyqësor, në bazë të vendimit nr. 157, datë 04.04.2023, se i plotëson kriteret për të marrë pjesë në provimin e pranimit në Programin Fillestar pranë Shkollës së Magjistraturës, për vitin akademik 2023 – 2024, profili “ndihmës ligjor”, sipas nenit 34, pika 6, nenit 53, pika 4, dhe nenit 55, të ligjit nr. 98/2016, “Për organizimin e pushtetit gjyqësor në Republikën e Shqipërisë” (më poshtë referuar si ligji “Për Pushtetin Gjyqësor”) si dhe në kreun V, të Vendimit nr. 424, datë 12.10.2020, të Këshillit të Lartë Gjyqësor “Për procedurën e verifikimit të kushteve dhe kritereve ligjore të rekrutimit të kandidatit për kancelar, për këshilltar ose për ndihmës ligjor” (referuar në vijim si vendimi 424/2020).

**2.** Kandidatja ka marrë pjesë në provimin e organizuar dhe është përfshirë nga Shkolla e Magjistraturës, në listën e renditjes së kandidatëve fitues në Programin e Formimit Fillestar për ndihmës ligjor, viti akademik 2023 – 2024.

**3.** Në funksion të verifikimit në kohë të pasurisë dhe figurës, duke qenë se kjo procedurë është e ndërvarur nga raportimet dhe informacionet e subjekteve publike dhe private që, sipas ligjit, duhet t'i dërgohen Këshillit, sipas Vendimit nr. 473, datë 07.09.2023, u vendos fillimi i procedurës së verifikimit të kandidatëve për në Programin e Formimit Fillestar pranë Shkollës së Magjistraturës, profili ndihmës ligjor për vitin akademik 2023-2024, duke caktuar relatorin për çdo procedurë verifikimi për secilin kandidat. Në bazë të shortit, për procedurën e verifikimit të pasurisë dhe figurës, për kandidaten si ndihmëse ligjore znj. {...}, si relatore u caktua znj. Fatmira Luli.

**4.** Në datën 07.09.2023, në respektim të detyrimeve të përcaktuara në Seksionin A, Kreu VI, të Vendimit 424/2020, kandidatja znj. {...}, në rrugë elektronike, u njoftua:

- për fillimin e procedurës së verifikimit të pasurisë dhe figurës;
- për caktimin e relatores së kësaj procedure verifikimi;
- për të drejtën që kishte për të kërkuar përjashtimin e relatores së caktuar dhe/ose të çdo anëtar tjetër të Këshillit, brenda 3 (tre) ditëve nga marrja e këtij njoftimi.

Po ashtu, kandidatja u njoftua edhe për detyrimin për plotësimin e formularit deklarues për adresën postare, adresën elektronike dhe kontaktit telefonik, për qëllimet e procedurës së verifikimit ndaj saj, formular ky që i është bashkëngjitur njoftimit.

**5.** Brenda afatit treditör, kandidatja depozitoi rregullisht të plotësuar formularin deklarues për adresën postare<sup>1</sup>, adresën elektronike dhe kontaktit telefonik, për qëllimet e procedurës së verifikimit ndaj saj. Nga ana tjetër, në këtë afat, kandidatja nuk parashtroi ndonjë pretendim në lidhje me relatoren e caktuar për procedurën e verifikimit ndaj saj apo për ndonjë anëtar tjetër të Këshillit të Lartë Gjyqësor.

**6.** Në datën 12.09.2023, bazuar në pikat 65 dhe 66, Seksioni B, Kreu VI, të Vendimit 424/2020, kandidatja znj. {...}, në rrugë elektronike, iu dërguan formularët dhe autorizimet përkatëse që duhet të plotësoheshin dhe dorëzoheshin prej saj në kuadër të procedurës së verifikimit të pasurisë dhe figurës për kandidatët fitues për në Programin e Formimit Fillestar pranë Shkollës së Magjistraturës, profili ndihmës ligjor për vitin akademik 2023-2024.

---

<sup>1</sup> Depozituar në Këshill me nr. 4653, datë 08.09.2023.

7. Në datë 20.09.2023, u njoftua Inspektoratit të Lartë të Deklarimit dhe Kontrollit të Pasurive dhe Konfliktit të Interesave (më poshtë referuar si ILDKPKI), për listën e kandidatëve për në programin e formimit fillestar, për të cilët do të kryhej deklarimi i pasurisë<sup>2</sup>.

8. Brenda afatit treditör, kandidatja depozitoi në zyrën përkatëse të Këshillit formularët dhe autorizimet përkatëse<sup>3</sup> dhe brenda datës 29.09.2023, kishte detyrimin për të dorëzuar të plotësuar formularin e deklarimit të pasurisë, pranë ILDKPKI-së.

9. Gjatë procedurës së verifikimit, nga data 07.09.2023, bazuar në pikën 67/b, Seksioni B, Kreu VI, të Vendimit 424/2020, përmes shkresave të veçanta, u kërkua informacion dhe raportim nga institucionet kompetente për verifikimin e pasurisë dhe të figurës, për kandidatët fitues për në Programin e Formimit Fillestar pranë Shkollës së Magjistraturës, profili ndihmës ligjor për vitin akademik 2023-2024, ndër ta edhe për znj. {...}.

10. Institucionet kompetente për verifikimin e pasurisë dhe të figurës, kanë përcjellë për Këshillin e Lartë Gjyqësor informacionet dhe raportimet e tyre në kohë të ndryshme (siç do të përshkruhet më poshtë).

## II. REZULTATET E VERIFIKIMIT

### A. Për verifikimin e pasurisë

11. Për kandidaten znj. {...} u verifikua kriteri i pasurisë, sipas procedurës së përcaktuar në Seksionin B, të kreut VI, të vendimit 424/2020. Konkretisht, për verifikimin e kriterit të pasurisë për kandidaten, u kërkua raportim nga ILDKPKI-ja, e cila ka dërguar në Këshillin e Lartë Gjyqësor raportin “*Akti i përfundimit të kontrollit të plotë të Deklaratës së Pasurisë dhe të Interesave Privatë të kandidatit për pozicione të ndryshme në institucionet e sistemit të drejtësisë {...}, për pranim në Programin e Formimit Fillestar në Shkollën e Magjistraturës/profili Ndihmës Ligjor*”, me nr. 192/23 prot., datë 19.01.2024<sup>4</sup>.

11.1 Sipas këtij Raporti të ILDKPKI-së, kandidatja {...} dhe personi i lidhur z. {...} {...} (bashkëshorti) kanë plotësuar dhe depozituar në afatin e caktuar nga Këshilli i Lartë Gjyqësor, formularin e deklaratës së pasurisë, si dhe autorizimet e kërkuara për verifikimin e pasurisë.

---

<sup>2</sup> Shih shkresën nr. 4853, datë 20.09.2023 drejtuar Inspektoratit të Lartë të Deklarimit dhe Kontrollit të Pasurive dhe Konfliktit të Interesave.

<sup>3</sup> Depozituar në Këshill, me nr. 4731, datë 13.09.2023.

<sup>4</sup> Depozituar në Këshill, me nr. 4853/2 prot., datë 18.01.2024.

**11.2** Po ashtu, sipas këtij Raporti, nga ILDKPKI janë kryer kontrole të plota për pasuritë, asetet dhe interesat e deklaruara nga kandidatja {...} dhe personi i lidhur, duke konkluduar se për kandidaten:

- a) *deklarimi është i saktë në përputhje me ligjin;*
- b) *ka burime financiare të ligjshme për të justifikuar pasurinë;*
- c) *nuk ka kryer fshehje të pasurisë;*
- d) *nuk ka kryer deklaram të rremë;*
- e) *subjekti nuk gjendet në situatën e konfliktit të interesave.*

**12.** Për verifikimin e kriterit të pasurisë për kandidaten {...} dhe personin e lidhur z. {...} {...} (bashkëshorti) u kërkua informacion nga Drejtoria e Përgjithshme e Tatimeve<sup>5</sup> dhe Drejtoria e Përgjithshme e Doganave<sup>6</sup>.

**12.1** Sipas informacionit të dërguar nga Drejtoria e Përgjithshme e Tatimeve me shkresat nr. 15261/2 prot., datë 02.10.2023 dhe nr. 63872/1 prot., datë 05.10.2023, kandidatja {...}, sipas të dhënave të sistemit informatik tatimor, nuk rezultoi e regjistruar në organin tatimor me aktivitet privat, por ka deklarata individuale vjetore të të ardhurave (DIVA), bashkëlidhur informacionit. Po ashtu, edhe personi i lidhur me të, z. {...} {...} (bashkëshorti), sipas të dhënave të sistemit informatik tatimor, nuk rezultoi i regjistruar në organin tatimor me aktivitet privat, por ka deklarata individuale vjetore të të ardhurave (DIVA), bashkëlidhur informacionit.

**12.2** Sipas informacionit të dërguar nga Drejtoria e Përgjithshme e Doganave me shkresën nr.15593/1 prot., datë 05.10.2023, për kandidaten {...} nga verifikimet në sistemin elektronik të administrimit të të dhënave të këtij organi, për periudhën Mars 2004 deri në 20.09.2023, nuk rezultoi ndonjë e dhënë me karakter pasuror. Kurse për personin e lidhur z.{...} {...} (bashkëshorti) rezultoi se ka kryer 1 (një) rast procedure doganore importi, konkretisht me deklaratën doganore IM 4, me numër R-5517, datë 20.03.2014 në Degën Doganore Morina.

**13.** Të dhënat e dërguara përmes informacioneve respektive nga Drejtoria e Përgjithshme e Tatimeve dhe Drejtoria e Përgjithshme e Doganave u ballafaquan me të dhënat sipas Raportit të ILDKPKI-së, u vlerësua se nuk kishte vend për t'i kërkuar ILDKPKI-së bërja e një kontrolli shtesë për znj. {...}. Po ashtu, referuar të dhënave të përshkuara në Raportin e ILDKPKI-së, të nxjerra nga dokumentacioni i paraqitur nga vetë kandidatja, si dhe ai i administruar nga korrespondenca me subjekte shtetërorë dhe privatë, dokumentacion që evidentohet hollësisht në Raport, sikundër dhe analizës financiare të bërë nga ky organ publik, përgjegjës për kontrollin e deklaramit të pasurive dhe konfliktit të interesave sipas ligjit nr. 9049, datë 10.04.2003, “Për

<sup>5</sup> Shkresa nr. 4852 prot., datë 20.09.2023 e Këshillit të Lartë Gjyqësor.

<sup>6</sup> Shkresa nr. 4851 prot., datë 20.09.2023 e Këshillit të Lartë Gjyqësor.

*deklarimin dhe kontrollin e pasurive, detyrimeve financiare të zgjedhurve dhe të disa nëpunësve publik”, i ndryshuar, nuk u konstatua mangësi në raportim, shkak për të cilin u vlerësua se nuk kishte vend për raportim shtesë nga ky organ.*

**14.** Nga verifikimi i kriterit të pasurisë për kandidaten {...} janë grumbulluar të dhëna të mjaftueshme mbi të cilat Këshilli konkludoi se nuk ekziston asnjë prej shkaqeve të skualifikimit të saj. Konkretisht, rezultoi se:

- a) kandidatja dhe personi i lidhur kanë plotësuar dhe depozituar rregullisht formularin e deklaratës së pasurisë;
- b) kandidatja dhe personi i lidhur kanë plotësuar dhe depozituar rregullisht, të nënshkuara, autorizimet e kërkuara për verifikimin e pasurisë;
- c) kandidatja dhe personi i lidhur kanë burime financiare për të justifikuar pasuritë e tyre;
- d) deklarimi nga kandidatja dhe personi i lidhur, i pasurisë, aseteve ose interesave private, të detyrueshme për t’u deklaruar, është i plotë, i vërtetë dhe i saktë referuar *“Deklaratës së pasurisë dhe interesave private të kandidatit për pozicione të ndryshme në institucionet e sistemit të drejtësisë”*.

## **B. Për kriterin e figurës**

**15.** Për kandidaten {...} u verifikua kriteri i figurës, sipas procedurës së përcaktuar në Seksionin C, të Kreut VI të vendimit 424/2020.

**16.** Konkretisht, për verifikimin e kriterit të figurës për kandidaten, u kërkuar raportim nga institucionet ligjzbatuese<sup>7</sup>. Nga raportimet e shërbimeve shtetërore informative nuk u identifikua dhe u verifikua ndonjë e dhënë për lidhje ose kontakte të papërshtatshme të kandidates {...}, me persona të përfshirë në krimin e organizuar apo për përfshirjen e saj në veprimtari që cenojnë sigurinë kombëtare apo aktivitete të kundërligjshme.

**17.** Në kuadër të verifikimit të kriterit të figurës për kandidaten {...}, asaj iu kërkuar dhe u depozitua rregullisht pranë Këshillit të Lartë Gjyqësor, më datë 13.09.2023, formulari i vetëdeklarimit sipas kërkesave të ligjit nr. 138/2015, *“Për garantimin e integritetit të personave që zgjidhen, emërohen ose ushtrojnë funksione publike”*, si dhe autorizimi për Këshillin që, në

---

<sup>7</sup> Shih shkresën nr. 4848 prot., datë 20.09.2023 drejtuar Agjencisë së Inteligjencës dhe Sigurisë së Mbrojtjes, shkresën nr. 4856 prot., datë 20.09.2023 drejtuar Shërbimit Informativ të Shtetit, shkresën nr. 4857 prot., datë 20.09.2023 drejtuar Agjencisë së Mbikëqyrjes Policore në Ministrinë e Brendshme, shkresën nr. 4849 prot., datë 20.09.2023 drejtuar Agjencisë së Inteligjencës Financiare, shkresën nr. 4855 prot., datë 20.09.2023 drejtuar Prokurorisë së Përgjithshme, shkresën nr. 4858 prot., datë 20.09.2023 drejtuar Prokurorisë së Posaçme Kundër Korrupsionit dhe Krimit të Organizuar dhe shkresën nr. 4850 prot., datë 20.09.2023 drejtuar Byrosë Kombëtare të Hetimit.

zbatim të pikës 82, të Seksionit C, të Kreut VI, të vendimit 424/2020, të kryejë verifikimin në organet kompetente sipas ligjit, të të dhënave të saj në lidhje me figurën dhe integritetin. Në kuadër të zbatimit të ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”, nga ana e Strukturës së Posaçme për Regjistrimin, Administrimin dhe Përpunimin e Formularëve të Vetëdeklarimit pranë KLGJ-së, janë kryer verifikimet e thelluara të të dhënave të formularit të vetëdeklarimit për gjendjen gjyqësore dhe gjendjen civile të kandidatës. Në vijim të përgjigjeve të shkresave të ardhura nga Prokuroria e Përgjithshme, nga Sektori i Gjendjes Gjyqësore, pranë Drejtorisë së Përgjithshme të Burgjeve si dhe nga Drejtoria e Përgjithshme e Gjendjes Civile, pranë Ministrisë së Punëve të Brendshme<sup>8</sup>, nga Struktura e Posaçme pranë Këshillit të Lartë Gjyqësor, pasi u kryhen verifikimet e rastit, nuk u konstatuan mangësi në të dhënat e deklaruara nga kandidatja në formularin e vetëdeklarimit sipas kërkesave të ligjit, duke konkluduar se znj. {...}: “- ka dorëzuar formularin e vetëdeklarimit më datë 13.09.2023; - formulari i vetëdeklarimit është bërë publik, në faqen zyrtare të web të KLGJ-së; - në formularin e vetëdeklarimit, nuk ka të deklaruar të dhëna që përfshihen brenda sferës së ndalimeve të parashikuara nga ligji; - nuk ka deklaruar gjeneralitete të mëparshme; - nga përgjigjet e ardhura nga zyra e gjendjes gjyqësore, rezulton e padënuar nga gjykatat penale shqiptare; - nga përgjigjet e ardhura nga zyra e gjendjes civile, nuk ka ndryshime në përbërësit e gjendjes civile; - deri më sot nuk kemi pasur indicie apo të dhëna kryesisht, për të kërkuar verifikim të thelluar nga Prokuroria e Përgjithshme”. Për pasojë, u vlerësua që nuk kishte vend për verifikim shtesë nga Prokuroria e Përgjithshme.

**18.** Mbi kërkesë të Këshillit të Lartë Gjyqësor<sup>9</sup>, Prokuroria e Përgjithshme ka kryer verifikimin përkatës në të gjitha prokuroritë me juridiksion të përgjithshëm që ushtrojnë veprimtari në Republikën e Shqipërisë, duke përcjellë në Këshill, me shkresën (me nr. 1455/14 prot., datë 16.11.2023) e rregjistruar pranë nesh me nr. 4855/1 prot., datë 16.11.2023, përgjigjet zyrtare të **13** (trembëdhjetë) prokurorive pranë gjykatave të rretheve gjyqësore të juridiksionit të përgjithshëm. Referuar përmbajtjes së këtyre përgjigjeve lidhur me verifikimet e kryera, **nuk rezultoi** që kandidatja {...} të jetë marrë në cilësinë e personit nën hetim në një procedim penal, ndaj saj të jetë regjistruar kallëzim/referim/procedim penal apo të jetë zbatuar ndonjë masë me karakter personal ose pasuror, ose të ketë të dhëna për procedime penale të mosfilluara, të pushuara dhe të pezulluara.

**18.1** Në përgjigjen e Prokurorisë së Posaçme kundër Korrupsionit dhe Krimit të Organizuar, me nr. 12136/1 prot, datë 03.10.2023<sup>10</sup>, nuk rezulton që kandidatja të ketë marrë cilësinë e personit

<sup>8</sup> Shih shkresën nr. 4847 prot., datë 20.09.2023, të Strukturës së Posaçme për Regjistrimin, Administrimin dhe Përpunimin e Formularëve të Vetëdeklarimit.

<sup>9</sup> Shkresa nr. 4855 prot, datë 20.09.2023, e Këshillit të Lartë Gjyqësor.

<sup>10</sup> Kthyer në bazë të shkresës kërkesë për informacion me nr. 4858 prot., datë 20.09.2023, të Këshillit të Lartë Gjyqësor.

nën hetim në një procedim penal, ndaj saj të jetë regjistruar kallëzim/referim/procedim penal, ndaj saj të jetë zbatuar ndonjë masë me karakter personal ose pasuror, ose të ketë të dhëna për procedime penale të mos filluara, të pushuara dhe të pezulluara.

**19.** Mbi kërkesën e Këshillit të Lartë Gjyqësor, sipas shkresës me nr. 4859 prot, datë 20.09.2023, të gjitha gjykatat e juridiksionit të përgjithshëm dhe ato të veçanta që ushtrojnë veprimtari në Republikën e Shqipërisë, kanë kryer verifikimet përkatëse duke përcjellë në Këshill, informacionin e kërkuar. Referuar përmbajtjes së **17** (shtatëmbëdhjetë) përgjigjeve zyrtare të gjykatave, lidhur me verifikimet e kryera, **nuk rezultoi** që kandidatja {...} të jetë marrë në cilësinë e personit nën hetim në një procedim penal, ndaj saj të jetë regjistruar kallëzim/referim/procedim penal apo të jetë zbatuar ndonjë masë me karakter personal ose pasuror, ose të ketë të dhëna për procedime penale të mosfilluara, të pushuara dhe të pezulluara.

**20.** Mbi kërkesë të Këshillit të Lartë Gjyqësor<sup>11</sup>, Byroja Kombëtare e Hetimit, me shkresën nr.968/1 prot., datë 04.10.2023, nuk rezultuan të dhëna rreth figurës së kandidatës {...}.

**21.** Nga verifikimi i kriterit të figurës për kandidaten {...}, janë grumbulluar të dhëna të mjaftueshme mbi të cilat Këshilli konkludoi se nuk ekziston asnjë prej shkaqeve të skualifikimit të saj. Konkretisht, rezultoi se:

- a) kandidatja ka plotësuar dhe depozituar rregullisht formularin e vetë deklarimit sipas kërkesave të ligjit nr. 138/2015;
- b) kandidatja ka plotësuar dhe depozituar rregullisht, të nënshkruara, autorizimin për Këshillin e Lartë Gjyqësor që, në zbatim të pikës 83, Seksioni C, Kreu VI të vendimit 424/2020, të kryejë verifikimin në organet kompetente sipas ligjit, për të dhënat që lidhen me figurën dhe integritetin e saj;
- c) për kandidaten nuk ka të dhëna për lidhje ose kontakte të papërshtatshme me persona të përfshirë në krimin e organizuar;
- d) për kandidaten nuk ka të dhëna që të ketë qenë ose të jetë, bashkëpunëtoresh, informatore ose agjente e shërbimeve të inteligjencës;
- dh) për kandidaten nuk ka ndonjë të dhënë tjetër në lidhje me sjelljen etike dhe morale të saj, mbi të cilën të ngrihen dyshime për cenim të besimit publik në sistemin gjyqësor dhe, për rrjedhojë, mbi pranueshmërinë e saj për në formimin fillestar për ndihmës ligjor në Shkollën e Magjistraturës.

### III. KONKLUZIONE

---

<sup>11</sup> Shkresa 4850 prot., datë 20.09.2023 e Këshillit të Lartë Gjyqësor.

**22.** Referuar përcaktimeve të Vendimit 424/2020, nga shqyrtimi i dokumentacionit të administruar gjatë procedurës së verifikimit të pasurisë dhe figurës për kandidaten fituese për ndihmës ligjor, znj. {...}, Këshilli i Lartë Gjyqësor vlerëson se procedura e verifikimit e ndjekur në këtë rast është e plotë dhe në përputhje me ligjin.

**23.** Bazuar në sa është parashtruar më lart mbi rezultatet e verifikimit të pasurisë e figurës, Këshilli i Lartë Gjyqësor vlerëson se kandidatja përmbush këto kritere dhe nuk ekziston ndonjë shkak për skualifikimin e saj. Nisur nga kjo, Këshilli çmon se është vendi për kualifikimin e kandidates fituese dhe lejimin e saj për ndjekjen e Programit të Formimit Fillestar të Shkollës së Magjistraturës, viti akademik 2023 – 2024, profili ndihmës ligjor.

### **PËR KËTO ARSYE:**

Mbështetur në nenin 53, të Ligjit nr. 98/2016 “Për organizimin e pushtetit gjyqësor në Republikën e Shqipërisë”, i ndryshuar; në nenin 61, pika 1, 86 shkronja “ë” dhe 97 pika 1, shkronja “a” të Ligjit nr. 115/2016 “Për organet e qeverisjes së sistemit të drejtësisë”, i ndryshuar; Vendimin e Këshillit të Lartë Gjyqësor nr. 424, datë 12.10.2020 “Për procedurën e verifikimit të kushteve dhe kritereve ligjore të rekrutimit të kandidatit për kancelar, për këshilltar ose për ndihmës ligjor”, Këshilli i Lartë Gjyqësor

### **V E N D O S I:**

1. Kualifikimin e kandidates fituese znj. {...} dhe lejimin e saj për ndjekjen e Programit të Formimit Fillestar të Shkollës së Magjistraturës, viti akademik 2023 – 2024, profili ndihmës ligjor.
2. Një kopje e vendimit të arsyetuar t’i njoftohet kandidates, znj. {...}, sipas kërkesave të nenit 98, të Ligjit nr. 115/2016 “Për organet e qeverisjes së sistemit të drejtësisë”, i ndryshuar.

Ky vendim hyn në fuqi menjëherë dhe botohet në faqen zyrtare të internetit të Këshillit të Lartë Gjyqësor, pasi të redaktohet për sigurimin e anonimatit të subjekteve.

### **PËR KËSHILLIN E LARTË GJYQËSOR**